

四庫全書

子部

欽定四庫全書

翰苑新書續集卷二十

縣宰類

通王知縣

方秋崖

天各一涯幾費池塘之春夢地方百里適分鄰壁之夜
光矧同班飛太史之鳧敬憑續傳故人之鯉時其後矣
喜則楚然恭惟某官落霞孤鶩之詞英鷺雲遊龍之墨
妙斗以南斗以北獨高奎宿之躔江之西江之東兩贊

使星之幙曩聞畫諾備極拊摩於以知寶婺之源賴有此玉山之秀畫簾之寂夜戶自恬大夫曰賢何乃奏瑤琴於五柳之縣天子有詔爾其鏘瓊裾於萬筭之班某一拜以還幾年於此方買犢叢山之底誰念吾民之最窮想停驂野驛之寒曾入君侯之太息敢不三沐願聞一言堯舜為吾君民毋憂掣肘魯衛之政兄弟翳欲比肩翹企金相庶幾玉我

通趙知縣

方秋崖

褰繡衣之幕快覩匿犀縮墨綬之章聿來儀鳳恍星辰
之在望曾日月之幾何恭惟某官早游諸老之間深造
吾道之妙以所學乃孔周之學要不在乎文墨議論之
工謂此心即堯舜之心自可寄以社稷人民之重曩窺
畫諾備極撫摩攬轡而志澄清雖古人無及者下車而
問疾苦豈今日獨忘之於以知凋邑之有瘳私竊與吾
民而相賀願言飛騎式徯交龜某五技已窮百為皆謬
田蕪而荒菊徑但欲賦歸去來今之辭縣古而出槐根

詎敢作居無幾何之計彼有成於墮甌僕方窘於膠舟
歛聞鸞鵠之掀騰信知騏驥之超越舊令尹必告新令
尹諒不勝父母之仁今將軍安問故將軍所覬篤子孫
之契惟日為歲朔風有懷

通傳知縣

方秋崖

見督郵而束帶久矣淵明之賦歸趣舍人而治裝是何
叔度之來暮凡三易人而及此既五閱月而跂予豈辛
苦之未償殆黃緣之有待敢贅鯉書之訊式遄鳧鳥之

飛恭惟某官身荷駿聲家傳鴻緒丈夫四方志尚不厭
平蠻煙瘴雨之間才名三十年自超出於光風霽月之
表試令言游之室已操宓賤之琴何以假當為真此猶
輕車之就熟路惟其有是以似豈特利器之遇盤根小
遲五柳之陰趣下九芝之檢某猿猱性野鼯鼠技窮高
山擁縣青曾不濃於歸興春水護田綠亦安有於去思
屢襪被以問涂旋挈家而還邸吾且自厭人其謂何豈
不懷歸畏此簡書竊有交龜之喜道之云遠瞻彼日月

願聞秣馬之期

通趙知縣

方秋崖

巖巘塞邑公方勇棄於及瓜僕僕脩途誰使不遑於擇
木適觀取舍賢愚敢致一行之書願聞數語之誨
恭惟某官鑑湖冰雪禹穴風煙自同餘子之卑不受諸
公之力初河陽辟温造欲取一人而拔其尤然潁川留
寇恂重違百姓而諾其請竊高雅操無負仁聲傳聞桃
李之春熙想見桁楊之雨卧白日少王事相忘扣角之

歌青山在縣門真可彈琴而治有令如此其民自醇遙
知私語於柳陰惟恐遄頒於芝墨某多幸覩朝陽之鳳
同班飛太史之鳧顧邑在萬山間所謂人棄而我取抑
身墮百僚底亦惟大黠而小癡失脚於茲噬臍何及必
苦李也始信君侯之眼高有甘棠焉知為吾民而眉蹙
如曰教之製錦則予敢不書紳望美人兮一方庶幾玉
我共明月於千里翹企金相

通宋知縣

真西山

河陽之花滿縣將播仁風玉川之屋數間行依德宇載
念論交之始可稽候訊之恭伏惟某官器識疏通丰神
凝秀淵源有自廣平之風烈未衰文獻相承元祐之家
聲如在早登歸第茂鬯芳猷寶鎮琢圭無瑕可指黃鍾
大呂隨叩輒鳴更于館殿之才來尹山川之縣百里而
恢牛刀未展宏摹一武而上烏臺定循近轍某猥慚迂
謬方幸退藏徒與老農共負耒為氓之喜愧無宿學辱
過門問字之勤

通崇仁曾知縣

穎秀

李梅亭

曉行湘水我方尋款乃之歌春靜巴山君來賦為予之
曲非釣魴之厚味漫致鯉於長鬚恭惟某官忠恕傳家
倫魁世業恢恢游刃如錐之處囊中在在影纓皆羅而
致幙下適通玉籍屈綰銅章預避譚公之維私不去顛
水之可厲維寶唐之褊邑固麻谷之舊都錦製此來繡
行甚寵改邑不改井易地則然有土此有財得人焉耳
奉潘輿其孔邇馳魏闕以非遙某兩鬢白紛隻身墨隱

昨班文石不能誨館下之諸生今戍武岡幸不失黔中
之上佐出晝尚遲於三日受滕願託於一屢操韓子赤
縣之權肯妄干於薄少荒鄭虔蒼苔之屋尚見芘其歸
來

通長汀黃知縣

方壺山

三山福地聚廬而居千里鄞江分邑以理然而實異得
以條陳材有智愚境分大小京秩之權穹而選人易與
相門之望重而宗子則輕况又來至而不先與乎僻左

而非近相去霄壤遠甚並稱子男得乎某官質本天成
美亦世濟儒服醞藉不墜家聲胸襟玲瓏無非縣譜沛
乎易矣有以覘之獻羨司征百乘之賦何有蜚聲貳令
一同之主可知果以最聞孚於衆聽不嫉頑而攘效者
息不留訟而凶器亦消孰疑長汀之民難化以理或問
莊定之後誰登于朝郎選方虛公歸則重某半生良苦
一第可憐更十九年雖羝亦乳凡再三仕如魚上竿曾
未闖於金閨誰實驅之鼎鑊業已失計寘諸勿言寄聲

杭境之民望來毋遽促膝槐堂之上求教乃行槩見於
詞毋孤所望

與蔡知縣朴

方烏山

有美種花煩公穀壁薄言采藻荒我茅田行徼惠於琴
堂敬登名於籤室恭惟某官員魁豪之學生仙聖之鄉
恥蟲篆之文辭自期甚遠擢龍飛之科第所立素高有
如雲霄濶步之初宜在風日不到之處既棲矮屋又肖
何曹逮再聽於臚傳盍徑躋於鵷列華亭鶴唳方忻近

尺五之天葉縣鳧飛乃願易一同之地吏驚神令民詠
慈君有畫簾寂寂之清無朝鼓鼕鼕之謗然而牛刀施
於雞肋驥足旋於蟻封聞諸廟朝方旌褒於三異由此
臺省將容與而九遷棠陰佳哉樵水重矣某稍知自勉
竟不能竒京兆聞浪仙之詩名非其好也內廷嗔風漢
之對語順而受之一科何補於遺餘本志自憐其變化
得溫所業幸冷其官安敢招諸生而誨焉所喜事大夫
之賢者列後堂之聲樂素乏豪名聞武城之絃歌恐有

愧色中丹所蘊副墨具陳

回浦城趙知縣

方烏山

瑣闌奏捷琴譜生輝猗佳王孫已接鷓鷯行之武業進
士舉更希龍虎榜之榮旗鈴四馳紳笏相慶伏惟某官
祥麟一角威鳳九苞途轍甚夷見謂金科之彥鍛鍊良
苦未忘鐵硯之心暫閒百牛之刀來酣萬蟻之戰聊哉
操筆易甚探囊功名遠到之必然富貴相逼乃如此矜
飛鳧鳥大展鴻圖某方賴寅恭却成薦送辱投珠之甚

侈愧報玖之未能比拜恩綸復厓賀牘何哉簿書煩委
之內有此翰墨遊戲之功鯨錦遣歸諒亦喜逢於具眼
騎裝行戒勉旃徑取於勅頭奚望之私染濡莫既

回仙遊興化兩縣宰

方烏山

慕龐德公之高未嘗至邑無范孟博之譽誤俾登車有
來味言深仞高誼敬惟某官琴瑟調甚雅錦製無瑕讀書
松竹林良多暇日種花桃李縣已滿清陰只俟雉馴即
看鳧入某舊聞其學今見而知之武城聞絃歌君想自

期於言偃發蜀道負弩矢我獨恥效於相如徒深巾笥
之藏莫效襜褕之報

回宜春劉知縣

方秋崖

郡國選侯何為及我江山帶郭所幸近公第令琴意
春豈勝戟衛之望伏望某官卓爾循吏異乎俗儒懷南
豐之瓣香久無續者詩西江之別派不在茲乎遙觀鳧
鷖之飛近有豸冠之例某少所諧可久於廢閒何意驚
猿忽相從於春水聿來烹鯉知自寂於晝簾惟不擾以

治之則無似之賜矣

回分宜陳知縣

方秋崖

言秣其馬僕方鼎來有翩者鳧公乃解去所謂交一臂
而失猶幸及半面之春伏惟某官粹然天球陳在廟璉
誠齋先生之宅相必昌於時季方難兄之故家奚為乎
縣整整三載之績平平六院之除某生而草茅老矣荆
棘忽相從於僚友則契所懷顧已上於更書何見之晚
竊願有請無庸遽歸

回萍鄉趙知縣

方秋崖

山林深密何自為州更點分明幸哉有尹聿有來於藻
翰胡猶斬於藥言伏惟某官三十年之薊雲二千尺其
溜雨落霞孤鶩誰則詩之朝天雙鳧其飛矣自有入
臺之近例何言作縣之古難某生而草茅老矣荆棘忽
相從於春水及爾同僚惟自靜於畫簾乃所願學有錦
之製毋玉爾音

回沈知縣

方秋崖

雲飛鳧鳥春治雉郊事大夫之賢坐想彈琴而治去父
母之國何當騎竹而迎遠哉遙遙于以負負恭惟某官
豪端茗雪之秀胸襟湖海之豪孤嘯風煙未覺休文之
詩瘦獨醒塵滓寧甘東老之書貧縱不盛之白玉之堂
奚至屈此青山之縣民瘼極矣吏奸奈何如使倒持太
阿而授之焉用若發新硎之為者一牛橫笛第令安雨
外之耕五鳳塗芝政恐有日邊之召願言公尹留惠疲
氓某起從田間寘之幕底邊城吹角毛錐顧安用哉茅

屋生苔老生亦欲歸耳自笑儒冠之誤每思農畝之荒
望美人兮一涯庶幾玉我共明月於千里翹企金相

回黃知縣

王暉軒

齊飛五鳳趣駕雙鳧相傳紫索之家直聽履而上耳不
鄙青山之縣欲彈琴而治之覺松竹之自矜與草萊而
相賀恭惟某官家聲江夏人傑洪都左圖右史之往來
無虛名下南浦西山之朝暮盡在胸中故嘗出其緒餘
所至為之特立謂且破拘攣之格便當趨禁近之班藹

絲乎保障乎方軫垂旒之念野馬也塵埃也亦煩製錦
之材然而四轄六院之除多在一同五月之最民望攸
屬公行勿遲某自塵一科不啻十稔拙於涉世曾掌故
之幾何放以還山煩惠文之彈去今既久淹於耕雨亦
無復煩於問天但得縣公如漢吏之循則與里老共滕
氓之幸看山無笏或容野服而迎種樹有書倘遂巖棲
之託其非公事寧敢私陳

回許知縣

方秋崖

璧琮纒藉已後公車之章金薤琳琅更勤私室之謝第
驚作者伏讀快哉恭惟某官落落乎千丈松昂昂然九
臯鶴不肯趨趨囁嚅而處富貴頗亦嘻笑怒罵而成文
章忽賦硯山之詩豈坐藍田之記縣官極不和耳曾奚
傷子雨之名小生欲相吏耶政恐犯朱雲之誚夫何唾
玉於穆斷金某退省其私焉能為有雖是翁不足與竟
事翩其去之謂同僚未嘗聞知人過之遠矣不知狂斐
敢拜重勤

回高知縣

方秋崖

胥告教胥保惠多幸同寅如升高如陟遐文章旁午公
豈欠此僕其慙然恭惟某官聲搖西州秀出南斗脩水
壯哉縣如絲之棼明府我輩人迎办而解朝天近只數
日去之某甚矣貪賢亡何慘別草木同味亦聊致區區
之心桃李不言又奚煩縷縷之謝讀之面熱毋爾盟寒

回蕭知縣

方秋崖

迂荊州牧政坐平生之草茅移鄭公鄉方竊緒餘於薤

水明以告我聞斯行之恭惟三舍源流五經鼓吹澤甘
棠笏極知雪案之尚寒彈單父琴聊與雲山而小駐諒
不待齊丘之瓜及已相傳漢壘之芝香東海生雅意本
朝今行召矣高皇帝能用人傑可復許乎某生而惡圓
至則遇坎戮揚干之僕縱不得中行而與之避庾公之
塵乃率老夫而至此願言提耳敢勿開心

回胡知縣

鄭雪巖

出宰山水縣仰羨展勤久遊翰墨場自慚分教屬鵝林

之未集致鯉素之稽遲敢謂謙詞先勤損墨恭惟某官
學有源委性率本真日光玉潔之文四舉何淹於禮部
鋒藏電掣之手大名已播於民曹自宜謀謨於廟堂胡
乃棲遲於州縣屈虞詡於朝歌之往盤錯可知得尹鐸
為晉陽之行保障有賴逮險阻艱難之歷盡乃功名富
貴之鼎來勿謂徒勞自應超異如某來從環壁偶掌泮
宮以古心讀古人書寢非故習仕今時慮今世事空有
隱憂聞君無煖席之時起我作同舟之夢春回雷土波

及斗城馬用牛刀已著寬柔之效會飛鳧鳥共修文字之盟占報恨遲有懷莫罄

回趙知縣

鄭雪巖

今年春早已減風寒百里雷轟頓回地暖人誰借問公定不凡某官布象云初割雞聊戲柳梢綠淺梅英紅少幾度歡娛麥岐秀發秧穎青芽一番念慮了却勸農公事端為得趣良辰只恐栽花已催飛鳥某幸逢知己何待卜隣不遐金玉之音決非常調認得芝蘭之味賸有

餘香良荷先施甚慚不敏

回輿國湯權縣

鄭雪巖

忽承明月之投知為高作雖未清風之揖已快素心久
撲塵埃若臨冰雪恭惟某官鏗鏗逸韻楚楚英標文落
人間皆謂得淵源之正詩雄江右諒不求絺繪之工永
諧韶濩聲盡洗笙笛耳白璧宜薦之清廟碧梧當植之
邃庭豈伊煙瘴杳謁之區可寓風月逍遙之興毋嫌迂
步要亦假塗斯立真文承會遇昌黎之刮目澤民非俗

吏豈無坡老之賞音當今舍公誰哉必有為王言者某
偶來贊畫茲幸正名對雨高歌曾慣無羶之冷燃燈草
檄豈其入幕之長有好斷金其人如玉想署雁鶩行之
暇聊試割刀不妨鷗鷺盟之尋敢忘寄鯉何時覲面共
我論心

回永福知縣

劉後村

受河陽之書幣甚矣懷慚聞武城之絃歌凜然起敬相
望數舍敬削一牋恭惟某官氣蓋羣公眼空餘子談笑

自方於管樂縱橫暗合於孫吳大學諸生咸服摛文之
敏集英進士共推對策之高早決勝於文場久宣勞於
戎幕當敵運衰微之際乃人才奮發之秋豈有時髦屑
親民事候雙鳧於巖邑未免淹翔收八駿於天閑佇看
騰踏某頃辭閩屬自乞祠宮嗟菽水之屢空迫弓旌而
復出赧顏至此清議謂何吾嘗同僚既託金蘭之契子
明告我願聞藥石之規

回建陽交代葉宰

奕孫

劉後村

男邦執壁崇已成陰老圃扶鉏瓜猶未熟曾是見大夫
之使及於新令尹之門敢掃空疎以脩好雅恭惟某官
淵乎似道默然知言鳴鶴在陰有唱必有和祥麟見獲
以德不以形粵自名登牕仕以來不知世有速化之事
居常曰義與命詎肯以身徇人晚詣公車驚委執青衫
之敝晨趨廣殿瞻臨軒黃繖之開惟徐行乃執事之素
心而須入亦先朝之良法雖為今吏尚有古風鞭笞盡
弛而令行鈎距不施而情得以己之誠待物之詐操此

之簡應彼之繁蓋有得乎蓋公清靜之言且暗合於陽
城撫字之說訟筒寂寂泉布源源通邑大都過客必談
於佳政深山窮谷逢人亦詫於長官頗聞百姓之愛公
惟恐一朝之去我未容青史獨書馴雉之祥將有綠綈
來趣飛鳧之入某剛介不媚槁乾無華少以功名自期
慨然投筆晚知富貴有命退而讀書貧未棄官格當為
邑頃采道傍之謠誦參以見聞竊欣閣下之規模易於
循守惟恃此以無恐遂居之而不疑飛來花縣之書驚

破茅簷之夢歲不我與豈敢即於晏安秋以為期幸小
寬於趣迫

回江陰何知縣

李梅亭

道紙上之軒昂皆我輩語就暗中而摸索乃魯東家有
味其言不知所賀恭惟某官人門具美天分仍高日食
萬錢盍追隨於伯父地方百里何局促於子男聊繼益
昌之功名即見中年之除寵某日之夕矣人謂斯何乘
興而來漸有回船之意同姓為近空餘推轂之情

回交代王知縣

戴象麓

趣嚴星駕來葢雷封措大規摹正自笑割雞之拙神仙
步武何幸報飛鳧之來望風忽拜於魚緘涓日喜交於
龜篆仰酬先辱俯愧後期恭惟某官氣節因歷練而益
高學問以老成而愈博宿乾坤於胸次戶牖玲瓏噴河
海於舌端波瀾汗漫宜自珠曹之掾即聯玉筍之班尚
以夢筆之才試此製錦之手跨劔閣之鳥道收拾山川
於子長周游歷覽之中試武城之牛刀發越絃歌於言

偃學道愛人之素况此雁居之莫集與夫堆堞之未全
末後未了工夫儘足施補袞之妙手將來出新意思或
可蓋揚糠之拙才不妨訪坡老之蹟於獨秀亭前更與
彈昇妃之月於八桂堂上追回禮樂總歸和氣點檢江
山盡作太平孰後孰先且低回於章浦以趨以走行促
上於瀛洲某造次鮮華癡點各半莫能傲米五斗宜彭
澤之未歸徒爾飽飯一升或山陰之粗治黔驢之技止
此鱸魚之興悠哉終茲三年去以兩月忽拜緘滕之寵

轉濃菊徑之思全賴匿瑕庶無洗垢敢期求舊行托契
於子孫何以告新願推仁如父母悰懷易感駢儷難周

回贛縣張知縣

孫養晦

媿二水以名城古為望郡分十同而置邑贛乃舊郊方
舊尹之及瓜趣明公之行李來之何暮歡不自勝某官
寬厚而不流靜莊而有守平生才力游泐而發新硯晚
歲功名啖蔗而入佳境尚拘新制來字遠民人有常言
以未脫選之為苦士方改秩又嘆作邑之為難求辦事

則傷於民專守法則拂於上計無能出或者援例而取
之下有所持又將以罪而去矣在今日堯舜之世而未
免此患雖前代卓魯之出而亦安所施嗟然通材臨此
壯縣凡衆人之所病皆談笑而盡得之假期年而有為
其召擢無可疑者某尚縻越俎未遂同舟小子不知所
裁莫報長牋之施大事則從其長姑為他日之圖情有
相忘言之無恐

代見泰寧趙知縣

長邑親戚因陳簿而見宰

戴象麓

省親千里來，依依簿之鸞。栖借譽一言，獲拜喬仙之鳧。
烏夢寐幾年之附驥，寅緣一日之登龍。竊幸自天知歸，
有地恭惟某官。帝室石麟之種，仙源彩鳳之姿。密邇日

雲

趙宰寄
居行都

偏承雨露聲猷，掀宇宙直不減千里駒之才。

文彩瑞朝廷，自是賦五色日之手。合在學士八磚之地，
暫持郎官百里之權。下車未播於政聲前，席首加於士
類。滿城桃李盡勞門下之栽培，一介芝苓亦願籠中之
收拾。伏念某迹窮株兔見小醯雞，春秋郡泮之齏鹽朝。

夕親庭之菽水窮年鑽故紙僅窺豹之一斑寸晷試陳
文屢戰蝸之兩角未肯退焚舟之志聊且為負米之行
假逆孔文舉之通家傾蓋趙平原之半面念表叔忝邑
曹之未獲事周旋而孀氏亦公族之華無非繾綣機會
之來非偶憐幪之託何如冷灰願借於吹噓斷木冀為
之潤色况寸效未收於藍綠而歸程欲趁於槐黃寒谷
微枯所欠幾分之和氣天潢餘潤願分一點之恩波

翰苑新書續集卷二十

欽定四庫全書

子部

翰苑新書續集卷二十一至二十四

詳校官中書臣葉元符

主事臣祁韻士覆勘

總校官知縣臣楊懋珩

校對官中書臣邱桂山

謄錄貢生臣王官

欽定四庫全書

翰苑新書續集卷二十一

縣寮類

縣丞
縣尉

主簿

縣丞

通寧鄉陳縣丞

李梅亭

武功之丞簡靖久矣沐芳臨邑之簿卑棲茲焉假蔭敢
以尺書之敬進於再拜之先恭惟某官遠抱甚都壯猷
孔碩清明志氣胸中風月之無邊沈浸文章筆下源泉

之不竭蓋徑要津之立顧淹贊邑之留鳳凰自下而升
高聊復爾耳雁鶩鉗左而摘右端使然哉雙陸之勢無
休九萬之程斯下某崎嶇副墨漫浪勾朱士安得自高
妄欲比鄰之託余方有公事願聞掃溉之吟

與李縣丞

夢索

方鳥山

贊府望高聊對藍田之竹間廳食少坐荒茅屋之苔行
矣熟瓜斐然削檮恭惟某官筆精墨妙學廣問多生於
西山之鄉淵源甚遠苦矣南宮之戰精銳不衰竟脫白

袍遂紆黃綬睽焉樵水邇甚粉鄉日哦兩松之間地僅
一嶺之隔官箴霜凜丞政不聳判筆風生識誰得噤然
以博習寬通之素加之淹翔練歷之深鷄表交飛當路
爭先於勝彥鷄行平入中朝况用於老成宜有裏言俾
儀表著某少豪自喜長拙無竒詩得浪仙之名非其好
也策遭風漢之目泰然安之偶不失於家羶詎敢當於
教席以嫌不可否丞之設端使然哉相與問襟期今而
後吾知免矣心之依倚辭不究宣

回寧海陳縣丞

惠孫攜陳司業書來

鄭雪巖

素結魚緘榮生駒谷得陽公司業寄字良慰交情知藍
田文丞其人皆吾臭味予方問菊君乃哦松幸受一厘
有光三徑恭惟某官清源望地潁川德星不墜家世典
刑綽然已試斷無世俗崖岸郁乎可觀正當早暎之餘
有望庶平之政爭鉗紙尾坐照機心逝流必會其源克
念厥紹下車先求其類取友必端以若所為可覘遠到
某歸田已晚入林頗深濫巾招隱之山回轍爭名之府

誰能備問定是不凡賦歸去之詞亦何暇巾車之命賡
來遲之句恨不居竹馬之先聊謝先施自愧不敏

回諸縣丞

方秋崖

久卧秋崖何心剖竹忽臨春水屬耳哦松翩其藻翰之
來胡不藥言之告有如粹秀當在清華予不負丞丞負
予尚題崔壁我匪即人人即我諒溢禰章某生而草茅
老矣荆棘忽有同寅之喜庶無已亥之訛以頌不規則
非所望

回張縣丞

方秋崖

野叟何人忽臨繡水大夫賢者適在錦鄉天所以惠幸
其無能君於是盤旋而未出伏惟某官粹矣趙玉宛其
國珍本文章家自有乃翁之科目為神仙吏已先諸子
之計偕梅隱高哉瓜期近只某寂無世念忽奉恩除老
子從牛背上來未知為政素書自魚腹中至曾靡贈言
以頌不規則非所望

回趙縣丞

方秋崖

漢竹分符屬吏紛之旁午楚汧涉筆欣宗彥之同寅蜚
積粲如驅車至只迺睽瑞麟之秀盍儀玉鷺之班予不
負丞丞何負予姑吟松署主固擇客客亦擇主諒溢薦
書某志護本根味均草木我愧元英子矣幸山水之相
知君非聊復翁耶儻箴規之樂告薄言占復竊幸丙融

回趙縣丞

劉後村

藍田千竹喜入吟邊楊子一屨適在宇下雖若燕鴻之
避雅聞笙鶴之音恭惟某官胸有層巒身爲磐石提筆

秋風之戰鵬已疊雙袖笏樵溪之遊鴻方漸陸脫或肯
排雲而蹈閭闔安知不跨海而望蓬萊資歷拘之歎息
久矣世豈舍我姑徐徐六月之飛丞不負予寧鬱鬱千
山之底式端薦墨不次除綸某久卧秋崖偶塵壁水
開緘見諫議之面三印斜封論文獻開府之詩一樽何
日有懷注仰無斁戢藏

回趙縣丞

方壺山

誕書政最休有頌聲辱在滕屨衰經詎容於旅賀不圖

禍刺華裾乃肯於臨存既莫迎玉矩之先其敢拜永條
之直輒上還於記府當別筵於賓闕

回李縣丞

方壺山

夙戒曹裝言歸鄭里哦松近只徯崔壁之新題折柳黯
然有滕屨之遺愛某未終素鞞徒悵錦帆惟諸大夫共
集於離筵俾不肖孤難參於卧轍我之懷兮願餐金鼎
之和王曰歸哉遄筵玉班之峻

回何縣丞

王懼軒

出綸楓陛涉筆槐廳頃仕帝京早識三何之風味茲游
佛國重陪二令之吟哦展賀臯遲先施倒置某官人温
如玉名重於山鍾淑氣於七公五相之門蜚大聲於千
英萬俊之數策勲場屋遜封胡羣弟之先登對策殿廡
皆晁董諸賢之忠告倒蔗漸逢佳境寒花剩有晚香露
政事之一班發文章之三昧金灘鷓鴣之舞方爾呈祥
藍田雁鴛之行又還寄徑况今棣萼正位栢臺諸公推
挽之亨途薦墨紛紛乎盈篋已不即人人即已爭願賞

音余不負丞丞負余行將召擢如某迂濶與時背馳贊
畫京畿自掇中都官之怒談經宗校莫逃貴公子之嘲
所幸知己之來必有相規之益既見君子則喜敬在下
風不與執事同心有如皦日

回丁縣丞

王懼軒

命錫芝函權分穀壁雁鷺以行進方驚貳令之威鯉魚
從遠來忽拜尺書之寵先施倒置函謝反遲某官續昌
黎似經之文生江淹夢筆之地負鄉先生之望私淑者

多奏子大夫之篇成功則一倒蔗既逢於佳境寒花賸
有於晚香俯為涉筆之游來贊鳴絃之化哦藍田之松
而有味紉楚澤之蘭以自馨余不負丞丞負余能使花
封之重已不即人人即已趣歸柳院之班如某其人何
庸於世少徒有志文場親被於百瘡壯不如人宦海纔
航於一葦竭來蓮幕密邇槐亭不徒降識君子之心且
有見似鄉人之喜州縣徒勞耳俱未免俯仰於人富貴
何有哉要相期遠大之業

回建陽黃縣丞

劉後村

傲戒行裝榮趨華次理紅藥碧苔之詠宜屬雅才為老
槐鉅竹而來足知高致方將聯事敢後脩詞恭惟某官
爽氣橫秋貴名揭日文盟素定布韋敢不心降賦草一
傳塲屋為之紙貴既擢太常之第盍為文館之遊然猶
作吏一行為丞再轉在君子所養者可謂厚矣任人物
之責者能無愧乎給札而賦上林會有關於薦口草書
而招贊普行入掌於詞頭某猥以散才領此劇處方有

曠官之懼忻聞贊府之來闕政必規君之惠非所敢望也署名惟謹丞之設豈端使然哉

回錢塘趙縣丞

李梅亭

余方有公事鼎來赤縣之官曹我未免鄉人益愧白頭之幕府有勤執訊敢闕報章恭惟某官卓爾不羣飄然無敵尋玉清洞中之字已書會計之功展錢塘江上之圖更動吟哦之興手版暫煩於畫地觚稜何遠於去天某輟鮒孤蹤磨牛陳迹喜似人於千里况辱託於粉榆

雖異事而同僚尚不遺於葑菲

回富陽趙縣丞

李梅亭

倚使者之車笑癡兒之未了題丞哉之壁聞公子之鼎
來未果脩詞先勤執訊恭惟某官五潢龍種千里駒材
早宣采棒之威坐獲綠林之賞雁鷺筜行而平立端使然
哉鳳凰自下而升高恐不免耳某強名入幕正愧面牆
赤縣官曹喜依仁之有幸黃塵衣帽或分蔭之自今

代回宣仁張縣丞

李梅亭

升陟一章何能借重謙勤尺牘又復拜嘉其文固是繁
然此禮畧之可也恭惟某官清餘家法敏有吏材翠竹
深林久已觀於停峙老槐古縣茲良費於吟哦無俟書
來亦當剡入未見分毫之補又勤四六之貽某辭壁未
能報瓊又乏樓臺近水奈何秋月之闌干桃李成蹊佇
見春風之披拂

主簿

通劉主簿

戴象麓

學製罔功粗喜及瓜之近同寅有幸暫煩棲枳之勞未
貢柔緘先蒙珍染恭惟某官螺川作者蟾苑仙才生六
一公之鄉邦見推翹楚擅二萬人之場屋允謂英竒經
國之文色正而芒寒名家之學源深而流遠既喜得親
傳之衣鉢必能大旌表之門閭雖已久於聞風顧何遲
於披霧然自奮身於蘭省便當策足於蓬山姑少淹記
注之才大其器識不憚領勾稽之職撫此凋殘願推平
生學道之心共致百里字民之政某戴星無補積日徒

勞邑遭再燬之餘民覺無聊之甚惟繭絲保障粗達其
宜故獄訟貨財難裁以法曾撫摩之敢憚幸疲瘵之少
蘇其如末路之尤難政賴同寮之相勉天開幸會果諧
訪戴之盟日借祥光行有依劉之便其為占謝莫罄願
言

通寧鄉蔡主簿

交代

李梅亭

望俊躔於淮海知敬儒先問邗道於洞庭偶從誤後貂
不足而狗續鴻高舉而燕來及未治任可無執訊恭惟

某官負材鴻碩蓄學駿厖中郎典刑晚亦宜於東觀客
卿富貴久盍見於西秦吾道非耶公等安在跨揚州之
鶴安得自高麾湘水之蛟能令公喜方今漢廷之老用
矣敢問吳會之意何如某志大心勞材疏意拙一科不
補欲釣鰲而未能五技易窮覺屠龍之無用所賴鸞鳳
之先戒棲枳何如無謂牛羊之下來求芻而止尚託子
孫之契欲窮師友之源向來一辯曾南豐苦難並世安
知四海習鑿齒不勝讀書

與馮主簿

考

方鳥山

士得自高何妨矮屋官名獨冷惟有泮宮昉此內交斐然通勢恭惟某官天賦甚厚地望素高西京循禮之家豈其苗裔本朝倫魁之彥遠矣源流靡須十上之勞竟取一科之寵雖曰卑棲於枳棘且忻密接於枌榆長欣季賀之盛名爭為署剡士聞鑿齒之緒論勝似讀書然而官未稱人位不踰德四十為主簿未足為淹三人至宰司曾有是比聊爾勾朱而入墨行方邈紫以凌青某

習於箕裘腐矣鉉少鳴場屋恥為舉子之文晚對殿
廷嘗入狂生之目薄言采藻乃幸識荆反教人為惟夫
子今而後免能令公喜微執事吾誰與歸依倚方深敷
陳罔竟

回新趙主簿崇法

戴象麓

光奉綸言榮司簿正古號章江劇邑政資佐理之長材
公乃仙潢英游幸借勾稽之敏手天畀寅恭之會日深
跂望之懷故飭慶忱仰酬光辱恭惟某官帝苑一角麟

之瑞士林九苞鳳之奇學問得源流太乙吹夜藜之燭
文章妙機軸天孫織雲錦之裳繇素蘊於茂猷宜亟躋
於臚仕合直上校讐之府何尚煩管轄之司大材蓋無
施而不宜遠到亦自近而後至暫茲棲棘少淹仇覽之
鸞行矣蜚英即快禰衡之鶚某儒生不武邑寄奚堪鼠
技嗟已五窮駑才豈宜再駕以小己之自揣舍大賢其
疇依忻幸此來預喜蘭金之託扶持厥後全資藥石之
規占謝雖勤編摩罔既

回諸縣主簿

方秋崖

顏厚如甲聿來遠江衷和同寅乃有羽簿幸肯依於藻
翰胡猶靳於藥言有如雋聲當在華貫高人屈居此得
無矮屋之打頭諸公爭致之必有雄墨之落手其宛其
老矣何以教之豈乏仁人之言頻攻謬守之闕不規而
頌匪僕攸聞

回王主簿

劉後村

與逸少友恍昨夢於樵川共阿戎談詒樂遊於泝水有

來顓翰深仍睠懷敬惟清霜紫電之竒盍遡紺霧紅塵
而上胡然矮屋屈此高標交二却之間喜而不寐愛小
王之帖藏以為榮亟此占訓切祈丙啓

回趙王簿

王懼軒

麟鬻分夜雪之燈未寒草夢魚素遞春風之訊適近枳
棲跂重論疇昔之心喜不隔同年之面恭惟某官聲光
如斗氣韻欲仙小奚佩古錦囊吟盡風檣之騷句太乙
然青藜杖讀殘寶苑之秘書久已騰淡墨之暉何至試

勾朱之最雲深曉殿盍隨鷓鴣驚之行花動春城式快鸞
鳳之翥竚頒瑤札儀我銀潢某拙則未除資亦不改弓
韜一尉樗櫟之材何堪硯老半生蠶鹽之味故在抵掌
豈甘於俗吏折腰猶迂於世情群然尻吠之信中以蜂
蠆之毒官事未易了此無已太康吾道其果非耶奚為
敢愠延覲金蘭之好惠垂玉薤之規野梅吹江路之香
尚須佳話山雨話爐亭之舊重挹清芬

回李主簿

方秋崖

青山擁縣有嘉樓。枳之鷹。綠水護田誰記去。家之鶴幸
來。瑤字如見玉人恭。惟某官輩行則魯靈光。器韻則禹
神鼎。蓋謫仙人之苗裔。無敵於詩。何飛將軍之聲名不
侯如故。安有學者之北斗。屈於進士之南廊。帝曰嗟哉
公等。何見晚也。仕其漫耳。高人亦主簿耶。第聞鄉曲之
誦言。少紓田里之愁歎。幸無忘於鐵硯。許重對於金鑿。
立登政塗。厥有故事。某起從襁褓。幾化兜鍪。多病每思
故廬。曾莫遂畢方之崇。此曹宜束高閣。何當低太白之

芒乃思耀金之書仍贊玉垣之畫其誰歸我所欠識公
萬戶韓荊州今之眠昔一詣習鑿齒秋以為期斷金則
同報瓊焉有

回沈主簿

方秋崖

夙戒曹裝遶趨儉幕猥辱驅車於委巷謂當祖道於郵
亭屬有負薪之憂徒切望塵之嘆願遵暑律佳御涼纛
倚須五月之報成驩傳四輩之召入

回連主簿

王實齋

某聞衣冠化強暴政在吾儕議論無瑕疵甚慙公牘豈
有朝廷之令甲不行田里之萌丁如公請張當寘王化
之外耳使民梗戾何以官府之設為嗟繆守其可欺挾
危言而相恐君且休矣聽回載雪之舟義以正之願謹
搖山之筆

回吳主簿

瑞

鄭雪巖

聞貴公子名已知一日千里攝部刺史職相遇二難同
時薄効薦言何勤選謝某官宗廟瑚璉階庭玉芝樊川

賦詩嘉其秀異城南就學勉以勤渠斷非矮屋棲遲會
見亨塗奮迅某幸可員備何待子言平時禮樂之觀不
勞歷騁異日治平之最可想光昭所期力行聊寓諄行

回余主簿

鄭雪巖

有來鸞鳳之音聞于空谷不斬鯉魚之惠貽及幽人渴
方望雲勝於得雨施先及我何以酬君伏惟某官壁水
名流柯山相種覽德輝於千仞翔而集之訪仙隱於三
賢今猶古也勿以簿書勾稽之末實主絃歌啟發之機

羞作彈箏肯羨秋風之一曲緬懷搖鐸未忘寒燈之五
更肯尋同盟是真臭味某雖未識面已先知心奈受屢
而為氓非公事不造邑揚雄之居甚僻問字有誰習公
之來可依讀書勝我願見君子罔有遐心

回沈主簿

部吏

劉後村

僕為陋邑敢謂種花君自脩門肯來棲枳乃脩短贄以
候先驅恭惟某官性行淑均文理密察周旋公府無刀
筆之刻深馳騁藝林有燈牕之勤苦遠遊閩嶠深厭京

塵如暫主於簿書即入還於省闈某服勞未久聒事方
新若俗吏之所為非所望也過長官而議事倘有意乎

回林主簿

危巽齋

太守自謂濫叨分竹之榮主簿何如遠致維桑之敬欽
哉高誼報以何辭伏惟某官鍾圓山漳水之竒似芸嶠
蓬壺之彥豈應短簿而滯長身日對康廬把酒趁勾稽
之暇暫遊星堰坐曹推贊畫之良莫歎低徊即觀識擢
某皤然一老愧此雙旌既有幸以依仁頃復諧於識面

驪龍塘畔曾為倚馬之留鸚鵡洲前徒結棲鸞之想拳
拳頌禱嘯嘯奠殫

回趙主簿

黃竹坡

仰唐室之宗英有如賀白拜子雲之筆札下視應劉鼎
來先施之謙行接同寅之好某官金莖孕秀玉葉傳芳
再戰而寡旗氣已無於前敵一命而佐邑賢不辭於小
官甘從卑飛無愧高士然下邑之佐皆為幕府賓客之
須明公此來何必簿書期會之應少望此府即華其歸

某寢負束書冒承巖邑非假左右提攜之助必有進退
溪谷之憂百畝之田五畝之桑愧夙無於善政七年之
病三年之艾端有藉於忠規

回建陽葉主簿

陳質牕

判神京之袂猛憶笑談分德里之符獨慳晤對未辨棲
鸞之間遽貽烹鯉之書敬用銘心不能去手某官鄧林
老幹崑嶠素珍入耳聲名邁唐室何蕃之傳到頭梯級
遲漢廷董子之科惟大器之晚成雖不容其何病毋謂

一官之躑躅實階萬里之扶搖勉事勾稽薄占經濟某
遠攜陋學游食此邦半月客程喜乍休於行役十年郡
俗疑頓改於見聞渴想警規以寬曠戾欲詣習主簿奈
何蹤跡之差池回念鄭廣文勿替襟期之傾倒

回武岡黃主簿

李梅亭

深叢見孤羆曾聽阿房之讀遠方遺雙鯉來司臨邑之
曹可謂聞音而楚然抑訝何見之晚也恭惟某官源委
深厚波瀾老成潁川第一之功固起甚庶之簿江夏無

雙之學蓋觀未見之書暫須矮屋以擡頭即快要津之
策足某罔功教胄承乏佐州聳承尚可送迎倘或免督
郵之逐短簿能令喜怒何幸同君子之僚

代回廬陵巖主簿

李梅亭

老夫耄矣不堪再鼓之衰主簿何如猶致一牋之賀恐
孤厚意聊且報章恭惟某官派分釣瀨之清文似漆園
之壯驂騑開道會即秣天山之禾鸞鳳冲霄姑少棲人
間之枳交章載路增秩匪朝贈我明月珠可見多時之

金... 卷二十一
簸弄乞君飛霞佩會看萬里之頽頽某高卧北牕却遮
西日軟紅可厭敢長戀屬車之塵堅白爭鳴惟欲據槁
梧而瞑謀歸決矣因謝及之

代回吳主簿

李梅亭

昭誣辨謗方欲賀君比事屬辭何為至我恭惟某官居
官能大遇事直前象有齒以焚身古今如此鼠無牙而
速訟事理固然幸疑似之既明將功名之自致暫蹶霜
蹄未為失何必尤人勿諱泥抗乃良規願觀進德

縣尉

通寧鄉李仙尉

李梅亭

一行作吏祭竈鬼以媚飢同官為僚禱尉仙而徼福可
無牋記先布姓名恭惟某官機量浚明風猷膚敏千里
之馬騏驥顧服鹽車九罭之魚鱒魴合登廟鼎鬱鬱赤
墀之志勿勿采棒之行茅舍之聽雞聲孰非王事花村
之無犬吠即是民庸人憐橫水之孤舟誰識倚天之長
劍乘除必爾翹跂俟之某不自力田輒謀耕祿家貧親

老誠有待於斗升官小職輕亦欲伸其尺寸然平生之
短朱墨須察友之助丹青儻念卑棲難倚掣鰲之釣猶
能拍浪請陪射鴨之弓

與朱仙尉

抑

方烏山

踐梅子真之職雖吏實仙哦鄭廣文之詩何官太冷及
瓜之戍削積通名恭惟某官峻闕摩穹清規照世名卿
顯相赫奕代之旂裳阿大中郎萃滿門之麾節自見麒
麟之墮地共期駒驥之越都胡以錦衣紆於黃綬太守

加禮固此聰明尉耶一郡皆驚謂真斷決手也然而故
國必有喬木思人而况甘棠聞諸廟朝方褒錄世家之
後如此人物寧淹留吏隱之間信瀉瀉之呈祥亟駕鸞
之就列某為儒而腐以才則疎黃卷對聖賢本不作科
名之想丹墀陳禮樂嘗極言權律之非雖今觸諱於轉
喉敢嘆射眉而中目既與世忤反教人為維桑梓必恭
今乃獲瞻於玉樹譬草木同味或來共聽於簷花依倚
方深揆裁靡竟

回泰寧張仙尉

方烏山

瓜戍告期花城司警南宮日上恩榮紙上之鴉北部一
行喜動灘頭之鴻亟裁柔訥徃候剛辰恭惟某官器度
端凝淵源深遠千古武夷山之麓鍾此英靈間年橫渠
老之門蓋其苗裔早上甘泉之計晚棲苦貢之場以老
將軍視前進士朱買臣之富貴維其時哉孟東野之酸
寒此何官也薄遊雷地行上雲天某貿然來思無可師
者不意寒糴之舊及觀采棒之新為君子僚方締金蘭

之好我丈人行儻聞藥石之言依倚方深挾裁靡竟

回諸縣仙尉

方秋崖

聿來竹使老已頽然有美梅曹訊其翩只得為僚而甚
幸何以頌而不規有如高凝當在華近尉仙吏也小煩
射鴨之弓吾何人哉亦挾怒猊之石某苦無高論政賴
仁言還觀五雲之飛曾微片語之及豈不屑教則予所
慙

回趙仙尉

王臞軒

野叟何人忽臨繡水大夫賢者適在錦鄉天所以惠幸其無能君於是盤旋而未出伏惟某官粹然趙玉宛其國珍本文章家自有乃翁之科目為神仙吏已先諸子之計偕梅隱甚高瓜期近只某寂無世念忽奉恩除老子從牛背上來未知為政素書自魚腹中至曾靡贈言以誦不規則非所望

回朱仙尉

王實齋

傳吳市之隱梅謹然傍午倚魯宮而采藻幸甚同寅辱

魚腹之遞緘喜馬蹄之壓境占辭已晚有覲謂何恭惟
某官筆下波瀾之老成胸中丘壑之灑落將軍百戰胡
為看市人之先封兄弟二難頗亦怪大夫之後殿黃絹
吐辭之絕妙青衫入手而未甘謂當綴天上星辰之班
乃復墮人間神仙之吏鼠輩相目此其聰明尉耶鷓序
有言且為清望官矣某泥古之學背時而馳讀賢於十
從事之書知同臭味賦不願萬戶侯之句快覲光塵

回趙仙尉

方秋崖

趣舍人裝隱神仙吏一琴一鶴故有家風八友八龍雅
聞譽處胡鬻刺疆之手小煩射鴨之弓恭惟某官冰雪
照人風煙滿抱衢故太末也盡攬爛柯之奇尉其真仙
乎式瞻喬木之古雖溧水欠孟郊之句顧吳門有梅福
之書奚事弓刀少迂塗轍高眠田里北部今無狐狸重
酌江山西臺當有鸛鷖某拙於涉世故以還山杞未棘
而菊未莎吾耕勞只荷為衣兮蘭為佩公望久之得毋
脩容則降既見

回王仙尉

方秋崖

飄飄仙吏寧隱窮山冉冉老農有來妙墨彼美雙溪之
秀可忘三逕之荒恭惟某官詩書典刑家世文獻問訊
淳熙之相印歲月幾何起分寶婺之天章江山故在何
意解牛之刃小迂射鴨之弓蓋鷗鵬九萬之程始從足
下想瀟灑一雙之瑞已在目中某且然得州決矣學圃
爾杞爾菊繼今無吠月之驚某水某丘誰與共耕雲之
樂尚駸犍犢伏覩匿犀

回胡仙尉

戴象麓

以鄉曲英作神仙吏日華五色亦何負摩空之賦聲春
淥一篙且不隔揚瀾之水鏡瓜時近只梅屋足然共惟
某官根柢詞林鏗鏘文響點頭無據豈其黃卷之誤人
燒尾不殊共是青衫之入手倘盟鐵硯重對金鑿某百
事不如一科亡補駕言出守倘遂賦廬山之高及爾同
寮何幸際吳門之隱

回南東鄧仙尉

鄭雪巖

再尋仙隱到江水之發源忽墜雲箋光泮池之分席聞
鶯鳴之有侶覺雁影以非孤恭惟某官抱經尋遺博傳
匪僻一第何足溷者如穎處囊諸公亦大竒之若珍在
席更加所養將大厥成宜平步於雲霄尚卻行於雷土
儒者之效已試南昌曾見於蜚聲君子所存者神西賊
必為之破膽少俟鷓灘之瑞即膺鳳閣之除某久困齏
鹽薄采芹茆梅花再見莫寄故人瓜戍前聞喜逢新友
不嫌獨冷已有相輝勲業方來諒不笑人之寂寂襟期

與共會須對酒於沈沈覲面匪遙定盟可待

回莆田方仙尉

鄭雪巖

少而好賦曾聞莆水之名家禮以為羅今傍崆峒之仙
隱本吾臭味先此惠音陳義藹然勞謙過矣伏惟某官
文有機軸學紹源流視子雲相如之同工既正而則比
屈原宋玉之變雅終和且平藹然孤峯卓乎遠器自應
搏扶搖而上也猶且覽德輝而下之不妨廢樓頭八境
之篇姑且藏胸中一鋒之用由是通金閨之籍誰能淹

綵棒之威某久向梅門忽求蓮幕嚶嚶求友之助丁
伐木之聲雖有同寅曷如共志風裁糾彈之暇頻訪吾
廬日旰籌畫之餘亟迎子駕盡損世俗之好是為道義
之真

回何仙尉

鄭雪巖

夜光之璧暗投初非具眼秋風之鞭先著允合僉言敢
襲品題以為己力人方自諱公定不凡恭惟某官圓機
鈎深脩綆汲古深造畫前之妙形為紙上之竒滴露研

朱莫非窮理草玄飛白默有知音蓋將得趣以忘筌豈
但明經而拾芥同場俱北謹言有司之得人此易既東
果見斯文之遇主唱先羣士氣張吾軍固嘗日誦項斯
恨未面逢杜甫有來飛騎曾不鄙於警曹方欲訪鴻辱
先施於記府勞謙過矣陳義藹然某甫離寒氈却從油
幕簡編卷舒之樂無復故吾獄訟禪贊之難其誰玉汝
茲有足恃將何以規臭味既同宜必罄腹心之告真情
相與願盡捐笑貌之恭雖未卜於親承其敢忘於永好

回沈仙尉

戴象麓

疏恩芝檢司警梅闌喜瓜戍之方新依輝伊始矧粉盟
之維舊增抃尤深方奏記之是圖遽飛箋之首及一謙
過矣三復欣然恭惟某官間世鉅才濟時偉器傳名門
之衣鉢為清廟之璫璵斂三光五岳之氣於胸中散六
執百家之書於筆下籍甚雷霆欲隱之譽粹然風月光
霽之標處富貴而不矜猶玉加藻遇事物而無滯如矢
發機宜首沐於異恩遂亟躋於臚仕便合待金門之詔

尚須宣采棒之威蓋抉隱摧奸小試神仙之手而安民
定國終須剛正之才暫焉游办之何勞行矣賜環之在
道某濫茲學製愧甚亡竒鼠技嗟已五窮駑才豈堪更
駕方深圖於善後幸欣際於同寅多事嬰心全賴蘭金
之託一緘拜手仰來藥石之規占謝雖勤編摩罔既

回包仙尉

志崇

劉後村

題名杏苑昔忝年家問戍花村今聯王事方締無窮之
好敢修不腆之辭恭惟某官胄緒清華品流高勝瑩牕

雪几有寒士之素風塵尾唾壺無貴游之豪態惟今人
物莫盛永嘉有宗工巨儒唱天下之文章有故家遺俗
接中朝之聞見况如吾子克肖乃翁宜掇髭而拾青氈
尚頰首而紆黃綬荏蒲迹掃桑梓陰成田里無虞宛若
太平之官府雲霄有路寧為下界之神仙某以蕞爾材
當壯哉邑明所以燭情偽頗覺瞽昏敏所以集事功顧
慙迂緩不待服勤於官守預知傳笑於吏民側聞少府
之賢矧有通家之契君子不黨寧翕翕以徇人同官為

自序
卷二十一
察尚諄諄而告我

回趙仙尉

劉後村

傲戒行裝榮趨華次風流公子肯為隱吏而來老鈍長
官喜得賢僚之助敢馳短贄以候前驅某官世德深長
天才竒逸生麟趾之世信厚藹然讀鴻寶之書見聞洽
甚顧貴名之方起何常調之小淹然而邑素浩繁路居
衝要桴鼓之聲雖息帶刀之俗自如必藉精明始能填
壓灞陵呵獵諒難浼於英才清廟圭璋行入儀於華貫

某方憐寡助竊喜同寅念時事方殷未遂淵明之歸去
儻公餘多暇願從東野之裴回

回劉仙尉

王曜軒

蓮池水綠方為異鄉異客之游梅市風清喜有同年同
官之好未辨赫蹠而展慶遽蒙綠綺之貽音某官天分
本高月評增重世有甘棠之笏家法典刑人如濯柳之
標風流醞藉自摘髭而登上第合策足而踐華途胡以
格拘來為吏隱五色棒定優於巡徼一縣花必預於栽

培早晚好音喜報鴻濶灘流之瑞權輿大用頓增雲龍
闕閱之光伏念某讀書不多諧世更寡忤時對策方輸
黃甲之三籌竊祿養親何補碧油之一畫既素無巧宦
之譜又不為時樣之粧正賴同盟時賜忠告州縣徒勞
耳俱未免俯仰於人富貴何有哉要相期遠大之業

回善化黃仙尉

李梅亭

習委吏之會計正爾卑棲聞飛仙之遨遊超然高隱方
圖執訊先辱飛牋恭惟某官文獻名流典刑勝士為公

室輔家夙近於魁三有伯父風學諒求於己百顧紆塗
轍小試弓刀河西之尉淒涼不常厥邑湖南之地清絕
幸疾其驅行即交章亟膺剡辟某冥心祭竈迫命代尉
短主簿髯參軍總無關於喜怒餐落英飲墜露願同廣
於離騷

回僊居石仙尉

陳箕總

霜雪欺頭詎堪兵事煙雲到眼恍覩仙標荷高誼之相
先媿短函之獨後某官性天清袒門第高華挺秀虞庠

共偉青錢之萬選揚英漢殿少遲丹桂之一枝契濶晚
成低徊小試遂以稽山之雋異屈於安洲之淒涼疊組
方新固若得魚而取掌揚纓維舊雅應附鳳以攀鱗會
見甄升以酬蘊蓄某蹉跎書劍蹭蹬功名惟安分以無
華亦強顏而有覲渴想儒冠之矩度以為武弁之聲光
丁獲識於字書毋貽姍笑寅獲同於王事共結綢繆

翰苑新書續集卷二十一

欽定四庫全書

翰苑新書續集卷二十二

監官類

賀史監稅

王暉軒

疏渥宸廷司征畿甸毗陵地近不妨時戲於綵衣韋曲
天低尤便日親於袞繡潔蠲吉積塵徹賀床某官敏莫
能追秀無可揀名父之子名子之父椿桂同芳難兄之
弟難弟之兄芝蘭競秀不以膏梁而習貴力於翰墨以

策勲肯為莞庫之官來養經綸之業惟大農泉布之經費係中都關市之常征豪家戚畹之互作梯媒猾吏富商之相為囊橐徃徃濶疎於巨蠹區區捫撫於細氓公定不然方勇除於衆弊民亦勞止必能寬之一分力量大則志可行名實孚則人自服多行好事正在妙年仁者安仁立使蒼生之蘓息相門出相行看華轍之飛騰如某其人見迂於世竭來入京兆之幕了不作時樣之粧援寡力微滿眼莫為之地道才疎氣直知心惟有於

老天所幸名勝之可依必出宦譜以忠告道同氣合何
當陪暇日之遊施早報遲僅免作隔年之債

謝吳監鎮

鄭雪巖

君已金閨通籍何待薦揚人如玉樹在庭疇不贊慶與
所當舉豈俟有求要是明揚何勞私謝某官名父之子
世家之英臺閣本末源流匪勞學治簿書監臨期會要
是假塗必取青氈乃光紫橐某偶然攝事遂獲尋盟天
上麒麟兒喜名門之有繼日邊龍虎榜看盛事之相聯

尚宜勉之永為好也

回林監倉

王耀軒

宸衷出綸帥藩司庾見者謂名卿之子肯此盤旋今而後倉氏之官不為冗濫稽遲展慶倒置先施某官胄子英遊清時偉望呼吸三山之秀氣發為詞源崔嵬雙闕之家聲不斷書種講聞素宦之譜佩服教忠之言翩然斜飛來此小試蓋乘田有職雖素王猶屑為之而治粟名官以國士亦嘗親此毋輕出納可養經綸况當疆場

之多虞正倚積貯以為命自今紅腐必無年飢用不足
之憂不日綠縑趣奉歲入穀幾何之對有如某者見謂
斐然仰破屋以哦詩嘔肝不悔俯大廷而對策空臆盡
言收科輸鼎甲之三籌入幕乏錐囊之一穎比於江西
訪芝蘭之友謂於門下為瓜葛之親略相先後以之官
或可牽連而託契豈無暇日共觀鄴侯三萬軸之藏祇
恐匪朝已預文子七十家之薦

回程監倉

林克齋

京塵眯目可勝河陽別行客之懷庾幕棲身幸有瀟湘
逢故人之喜辱篤年盟之舊猥蒙雲翰之先高義凜然
私衷惻若某官妙參道間雄壓文壇夙傳洛學之源流
俯掇漢科之第一霜蹄得路洗凡馬而一空溟翼垂雲
搏風鵬而直上僉論早期於遠到冲襟不厭於卑棲兵
食足於斯嘗服聖言之旨會計當而已何妨委吏之為
矧控帶於上流正倚毗於大手飽貔貅百萬衆自令列
壁之精明舉筦庫七十家即被公朝之甄擢某受才甚

下賦分多竒自屏迹於丘樊已冥心於造物詐意起家
而贊畫遂令末路之得朋退之姑詠於盎糧敢云騁辯
白也願陪於樽酒時與論文

回李都倉

陳箕牕

同鄉擢第嘗聯八士之中內甸效官又玷雙員之末疊
此多幸光其一寒正步武之有期何飛文之首辱某官
經郭宏博德寓邃深胸中牙籤三萬軸之儲筆下錦瑟
五十絃之奏出其小小科名已如摘髭辨彼多多功業

何啻唾手胡為煮海輒礙通津官由濁以見清事即小
以觀大倚聞推轂即迓飛騰某一別何遙重逢已慕心
如髮短已不問於行藏材與齒疎更未諳於出納幸逢
雅故為作朋寮驅其埃壘之棕扇以清明之燄歎一日
機緣之寡知己幾何欲三千憂責之寬因人而已

回徐監酒

方秋崖

南州高士何意糟丘東里先生適眠甕牖契我屬饜之
久得君醞藉之奇伏惟某官郎官之清賢人之粹才酣

八斗人言鳳穴之雛心醉六經誰謂鷓冠之關若稽觴
政適暢詩情豈欲事椎破壚罌之為方將養爾作麴蘖
之用金龜解換蓋謫仙人玉螳沈冥有醉鄉記聊復遣
君之且去恐煩天子之呼來某自笑湘纍之醒政坐魯
國之薄身名不如一杯酒何幸飲醇拍浮得滿百斛船
倘容問字

回奚監酒

方秋崖

粵起鱸堂小留虎帳談笑青油幕安用腐儒飛墮碧雲

牋甚慙鄉友此豈醉翁之誤我政恐空山之怨人不曰
師乎何嫌廣文之冷拔其尤者孰云處士之良尚邀粉
社之春毋靳藥言之益

回喻監酒

黃竹坡

高懷如許姑笑傲於瓊林撫謙自將方鼎來於雲翰恭
惟某官圭璋其胄金玉其相抱負異能允矣千人之秀
飛騰茂實籍甚諸公之間豈能步兵之厨乃置清廟之
器良醞可戀暫煩權酌之謀要津立登適被清華之選

某折腰漫爾聞名藹如茲乘脩途發軔之來將遂劇談
揮塵之便何時得出禁酒國曾徵傲世之人累麴便築
糟丘臺行致謫僊之容

回黃監酒

王暉軒

出綸天陞董醴日畿碧油九鼎之重言辟書甚寵良醞
三升之可戀官况最清展慶臯遲先施倒置某官沈酣
周孔糟粕莊騷毓秀九華鍾清淑中和之并沂源雙井
得風流醞藉之深妙三昧於文章露一班於政事家傳

青白不隨世味之酸醎宦業芬芳賸得名流之膾炙惟
神臯權醕之利闕大農經賦之須逢麴車口流涎人皆
圖於倖得飲醇耐心自醉帥獨念於舊交厥選至榮其
言可味正可品聖清而賢濁不妨笑人醉而我醒名下
無虛人暫樂仙壺之日月樽前有此客行班紫漢之星
辰某之迂踈世所姍笑吟詩無用生涯不直於一杯遂
祿何求親養已辜於三釜竭來賓幕不入時粧所幸名
勝之來遂託寅恭之末既見君子則喜敢在下風不與

執事同心有如白水

回叙州茶帛張監庫

李梅亭

海上八月之仙槎昔幸逢於博望山下十年之老石今
再過於穀城淒其一夢之驚愧此尺箋之貺恭惟某官
風標靖重器識端溫近世名卿疇若乃翁之清介當家
與學定存似是之典型紆餘入幕之賓協相摘山之畫
春風萱草承燕喜之慈顏秋露蘭芽已蟬聯於宦牒佇
觀濟美還入旁招某叨領墓頤獲迎鷓首見名駒之汗

血良慰故情懷野鶴於未仙還悲往事

回趙船場

李梅亭

巨川作楫夙知家學之高野水橫舟謾借時材之重袖
長箋而見畀搔短髮以懷慙恭惟某官籍甚宗英蔚然
相種若射有志已穿鷗鷺於西風其釣維何行掣鯨魚
於東海顧屈箕裘之學暫司剡剡之功當斧斤閒暇之
時聊聽數聲之鶴唳文字芳鮮之績即看萬斛之龍驤
某巢幕非材濫巾有覲登天而攀蜀道昔逢峽水之倒

流航海而遡斗門今覺村船之逆上幸百聞之一見及
異事而同察胡越叶心何況不殊於臭味魁台齊色尚
期勉繼於芳馨

回新添差趙監押

楊誠齋

懦緩無庸濫分寄郡戎昭且整將倚宗英貽書粲然陳
誼厚甚大有勤於四六感益倍於尋常恭惟某官曹出
文昭學深武畧振振麟定夙高趾角之仁肅肅免置合
任腹心之選以斗州之甚褊辱天族之肯來桴鼓不驚

藩維自壯某獲叨聯事將幸分憂察閭里之姦邪願無
犬吠冠宗室之議論庶款燕談

回高監稅李巡檢

李梅亭

區區薦士蓋採公言疊疊陳牋何勤私謝所願激昂於
事業庶無孤負於品題報不成章言不盡意

回龔監獄

李梅亭

懷湘屈之清來隱城池之上聞楚龔之潔實在邦域之
中方圖班牋已沐注記恭惟某官器資膚敏業履端方

清淑炳衡岳之靈忠信挺巫嶠之秀學歐陽子端是百年能幾見之人師昌黎公願有四舉乃一得之嘆謂高登於雲路乃勇退於急流游奉真祠益彰雅操寧與騏驥將與雞鶩甘從考澗之槃小不虺蜮大不鯨鯢可見在山之潤紅藥猶堪於傍砌青蒲會報於裏輪某拙不逾人狷弗諧世誨諸生於館下以冗見治試別駕於人中何卑敢憚正擬編蒲之暇款求拔薤之規居是邦事其大夫願依賢者舉進士吾為同業能勿誨乎

回薛監庫

劉後村

別阿蒙於吳下尚記風標憶李白於江東至形夢想每
逢交舊必問夫君忽聞馬首之來不知履齒之折恭惟
某官心期磊砢氣宇英華所學山高而海深其文天清
而水止有是美質生於名家自常州為多士之宗至端
明任天下之重文獻之盛淵源所漸討論古今叅訂師
友涵養之到語不雕刻而工體驗之精事皆迎刃而解
吾黨寶之如拱璧諸公挽之於青雲曷韜其光乃隱於

酒意者覽別都之形勝因而攷六代之廢興登山臨水
以抒其文辭枕麪藉糟以寄其豪放然而時尚多故義
難旁觀人物眇然公等安在何來之暮實獲我心某本
自倦遊漫來應辟懇切空長於憂慮暗踈每濶於事情
急書交馳舊學都廢方茲懷友何幸為僚買鄰而卜居
庶償初志登高而弔古倘許並遊

翰苑新書續集卷二十二